



Йёскалык библиотека — вьльдэм тусын.
Udmurt.ru вотэс бамысь туспуктэм

ЙЁСКАЛЫК «ЛЕНИНКА»

Ойдо Йёскалык библиоте- кае!» — шуэмлы куд-огез паймыса юалоз, дыр: «Кытчы?» Угось тросэз понна Удмур- тиысь бадзымез библиотека «Ле- нинка» нимын тодмо. Нош чапак шаерысьтымы лыдзиськон юрт Россиын нырысетйез басьтйз «На- циональной» ним. Со ньомыз понна лякемын ой вал — 1989-тй

арысен Йёскалык библиотека нимысьтыз саклык висья Удмур- тиысь лулчеберетлы, историлы, шаертдонлы сйзем книгаосты, документъёсты утёнлы-люкан- лы, сое калыке вёлмытонлы. Озы кылдйзы «Йёскалык книга» но «Йёскалык библиография» про- ектъёс. Лыдзетьюртысь ужасьёс- лэн шаермы понна бадзым уж

лэсьтэмзы – «Удмуртиесь печать-лэн летописез», «Удмурт кырзан», «Удмурт кылтодос», «Мултан уж», «Кузубай Герд», «Ашалчи Оки» но мукет библиографической указательёс дасямзы – Удмуртиесь Кун премиен пусьемын вал.

Мар бордысен кутскиз Йёскалык библиотекалэн историез? 1918-тй арын, Иж завод посёлок город луэмен валче, кивалтисьёс огъя библиотека усьтыны малпазы. Виль лыдзетьюртэ 20 сюрс пала книга люказы мукет библиотекаосысь, заводёс бордын ужась лыдзиськон сэрегъёсысь (нялтас вераса, Ижысь нырысетйез библиотека усьтиськиз 1899-тй арын завод бордын). Озы тулыспал толээе Иж город библиотека ужзэ мытйз. 1937–1957-тй арьёсы лыдзетьюрт А. С. Пушкинлэсь нимзэ нуллйз, нош 1957–1989-тй арьёсы со В. И. Ленин нимо вал. Дыр ортчем, будйз библиотекалэн статусэз но. 1920-тй арын, Вотской автономной улос кылдэм бере, библиотека областной луиз, нош 1934-тй арын элькун лыдзетьюртлы пöрмиз. Отйяз со научной луиз, нош собере – Йёскалык.

Усьтйскемез дырысен кöня ке пол вoшьяскылйз библиотекалэн дорез но. 1920-тй арын со пычал тйрлык поттон фабрикалэн кузёезлэн Николай Ильич Березинлэн юртаз интыяскыз. 1930-тй арьёсы – Советской урамысь 32 номеро юртын. Бöрысь калык лыдзиськыны пыралляз Коммунальной (али М. Горький нимо)

ульчаысь 78 номеро юртэ. Татын библиотека ужаз 1958-тй арозь. Но 1957-тй арын пуктэмын вал юрт, кудзэ али адзыны луэ Советской урамысь. Но дас ар талэсь азыло библиотекаысь фонд (соин чöш – ужасьёс но) Ижкарысь пöртэм интыюсы карьяськоно луизы. Ленинлэн бадзым монументэз сьöрын сыйлысь юртэз ворсазы 2011-тй арын – сое калыклы кышкытлык кылдытйсь шуыса ялйзы. Библиотекаысь ёзэтьёсты шоркарысь пöртэм сэрегъёсы интыязы. Эоскыт висетьёсын ужаса но, библиотекарьёс ужзэс азылантйзы, лыдзисьёс понна пöртэм ужрадъёс ортчытьязы, проектёс бордын ужазы. Нош «Ленинкаын» 2019-тй арысен библиотекарьёс интые лэсьтйськисьёс кузёяскызы.

Туэ 16-тй куарусёнэ Йёскалык библиотека öсьёссэ вильысен усьтйз. Юрт кöня ке поллы бадзымаз, али пöртэм отдельёс ог 9 сюрс квадрат метрын интыяско. Татчы вуэм нырысетй куноос виль библиотекаез: конференц залэз, коворкинг центрез, нылпиослы висетьэз, литературной залэз, дышетскон центрез но мукет интыосты – паймыса но синмаськыса котыръязы. Вильдэм библиотекаез но вaмыштэм потэ – татын вань луонлыкъёс кылдытэмын ужаны но, ваньмон дырез пайдаё орчытыны но.

1 миллион 500 сюрс пала книгаос но доразы берытскизы. Библиотекаез усьтон нуналэ книгоподъёмник вылэ поттэмын

вал калыклэн тужгес яратоно книгаосыз. Шаерамы ульсьёс тужгес чөм басьяло Михаил Булгаковлэсь «Мастер и Маргарита» романзэ. Нош Удмуртиын потэм изданиос пöлысь яратонез луэ «Мифы и легенды удмуртского народа» книга.

Библиотекае котькинлэн аслаз сюресэз. Мон понна лыдзетьюрт пичи дырысеным кыкетй дор кадь потылйз. Школа бере бызьыса мынйсько вал Баграш-Бигра гуртысь библиотекае – угось отын мамае ужаз. Татын ик ачим но библиотекарьлэсь ужзэ верьяй: кытчы ке жамдэлы поталлякуз, мамамыным оске вал лыдзисьёслы книгаос сётъяны. Вуж юртын котьку кезыт луылйз, соин гужем öсэз усьтыса возьылйм. Озы огпол аспöртэм лыдзисьёс вуизы – ва-риж усьтэм öсэтй ыжьёс пыризы. Али гуртысьтымы библиотека виль юртын интыяське ини. Озы ке но али но шöдйсько на кадь вуж тузонзөм книгаослэсь зынзэс, пукисько жöк сьöрын, Николай Кунлэсь «Мифы и легенды Древней Греции» книгазэ лисьяса.

Собере улонам кылдйз Удмурт кун университетлэн библиотекаез. Чеберлыко литературая отделэ арнялы быдэ пыралляй – нырысетй курсың Стругацкий агай-выньёслэсь вань произведениоссэс лыдзи.

Анастасия Шумилова,

«Кенеш» журналлэн валтйсь редакторез

Огпол «Понедельник начинается в субботу» повестез кури но, библиотекарьёс ас понназы серекъязы: милям но, пе, вордйськонмы көснуналысен ик кутске...

Йёскалык библиотекаысь яратоно интые – Йёскалык но шаертондэн литературая но библиографияя центр. Татысь ужасьёс юртто шаеренымы герзаськем литератураез шедьтыны, узырмыто «Воршуд» электрон энциклопедиез, орчытьяло тунсыко ужрадъёс, элькунысьтымы дано муртьёсын пумиськонъёс но котьку шумпотыса пумиталляло лыдзисьёсты.

Али Йёскалык библиотекае нуналлы быдэ пыраллясько, шуыны луоз, юртазы вуылытэк но. Угось трос удмурт книгаос, вуж но виль изданиос, люкамын электрон библиотекаязы (elibrary.unatlib.ru). Та дыре электрон библиотекаын люкамын ог 40 сюрс документъёс.

Библиотекаез усьтонлы шумпотэменым валче, пушкам оскон уг быры, гуртьёсысь лыдзиськон юртёс но азыланяз уз ворсаськылэ шуыса. Угось библиотека – со книгаослэн гинэ корказы öвöл, со лыдзиськыны яратйсь но дуннеез валаны тыршись адымиослэн дорзы. Со лулчеберетэз утись но азинтйсь инты. Соин котькуд библиотека – шоркарысез но, пичи гуртысез но – чебер но бордаз кыскись мед луысал.